



一之文  
二之詩

# 南圃行業

寶安署齋  
第三刻

## 南圃行業序



寸士擅博雅之長負曠逸之氣朝  
於改攄其心情夕哦諷其得失而施  
之於用輒弗效世遂疑詩并政兩不  
相謀而乖也古者太史陳詩以觀民風  
世道汙隆皆可考鏡豳風七為之



章其著於民事何切也今夫變玉  
於日月星辰化玉於昆蟲草木撫  
取驗焉以厚勸民而上下之相愛父  
子夫婦之相保祭祀之以時燕享之以  
度食力勸弱之不輒而衆知治之道  
矣是故豳風詩也周人詩人也古今


政治之美無如周公而取材之富無  
如豳風詩不通於政哉始予京雒  
得友

邑父侯高西崖先生知其善於詩  
也逮迄於榆見其操刀而割若烹小  
鮮盤根錯節迎刃而解知其善



於政也 父侯著述克棟後先剖  
劓南圃行業特其一班耳予故樂  
得而道之使天下咸知 父侯以溫  
厚和平之氣又治吾邑教化有茂  
淪肌洽髓庶幾君子尚禮義而崇德  
小人勤稼穡而循分蓋猶有豳民之  
遺風焉詩之為教其所造於下  
邑不又多乎哉是為序

康熙壬子上巳之吉治年弟初文友  
拜撰并書









葛亭詩艸序

素園詩艸序

記 一篇

寶署園林記

書 二篇

與陳子篤論詩書

與陳子篤論文書

傳 十二篇

高氏始祖東溪公傳

一世祖祿成公傳

二世祖雲甫公傳

三世祖添祚公傳

四世祖著美公傳

五世祖樸庵公傳

六世祖坦庵公傳

七世祖逸叟公傳

八世祖滌山公傳

曾大父贈太史公傳



先大父太史公傳

先府君贈文林公傳

卷之下

詩集

五言古詩 五首

梅花歌

陳子篤社兄携葛亭詩集入粵余讀之

驚賦

閱七閩高言集喜得趙雙白王美厥二

子詩

讀宋藝圃集李子田先生所選者

讀元藝圃集

七言古詩 十一首

與陳子篤訂明詩比玉集成漫賦

丁明汲廣文初度

東莞八景

市橋春漲

鳳臺秋霽



黃嶺廉泉

寶山石甕

彭洞水簾

靖康海市

海月風帆

覺華烟雨

東湖赴尹瀾柱吏部之招與陳元孝梁

藥亭凌天杓屈翁山林叔吾諸子同

賦

五言律詩 十六首

菜湖二首

琥珀坑卽事時有徵租之舉二首

榕亭雜咏二首

贈屈翁山山人

送季度遠世兄回毗陵

蘇涌二首

正月十六日盧述公廣文初度

元宵與吳曰謙陳子篤蔡枚仲雋司觀



燈

協恭堂與尹伯興查懷孔福修齡三遊

戎小酌

宴盧升卿山樓兼賦贈

以詩代書荅康晉公年兄

聞楊爲谷年兄赴遂平之任賦寄

七言律詩

十二首

富雲麓學士遠函過問賦謝

陳昌箕先輩携王望如陳澹庵二寅翁

書至喜而有述

陳伯球有臨高之行訪其弟次和氏便

道人東莞賦此爲贈

贈祁爾嘉進士

胡抑抑世兄來自淮陰賦贈

荅李鵬遠世兄時吾師在任縣因候問

之

元旦試筆

人日壽祁珊洲工部



和長公叔氏來韻

早春送王敬之世丈還長山

早春坐雨

五言絕句 五首

石龍舟次二首

自咏二首

題遊春圖

七言絕句 九首

鐵岡驛二首

九

題畫二首

對月二首

題張若篆画冊三首



寶山第三刻

南圃行業  
文集

閩漳高維檜西懷甫著

全史紀要自序

天地間有大文焉經史詩文四者而已或問經史詩文四者作者之法何居讀者之法何居余嘗讀鄒魯書竊取其義矣子曰假我數年五十以學易可以無大過矣子所雅言詩書執禮皆雅言也知我者其惟春秋乎罪我者其惟春秋乎此作經者之法也亦讀經者之法也子曰殷



因于夏禮所損益可知也周因于殷禮所損益可知也其或繼周者雖百世可知也孟子曰天下之生久矣一治一亂此作史者之法也亦讀史者之法也子曰詩三百一言以蔽之曰思無邪孟子曰說詩者不以文害辭不以辭害意以意逆志是爲得之此作詩者之法也亦讀詩者之法也子曰爲命禘諫草創之世叔討論之行天子羽修飾之東里子產潤色之此作文者之法也亦讀文者之法也子其知之否特以四者

之書浩繁難以卒業余於是不揣固陋集數百家言謬成經史詩文四部序論凡二百餘卷每公車入都必挾與遊敬以質之海內名公宗匠間多許可者戊申秋余以李官改令寶安卽以就正鄭楚玉尹瀾柱陳兩伊盧升卿諸先生又謬加獎賞且爲序言請梓余以採集未精故未敢災木蓋有所待也余之來寶安也架上諸書不能五車以載姑束之丹霞樓頭因念文昱懋煊二小子年來亂離廢學惟督以家世所習者



易他經未遑也詩文于制舉有別亦遲之獨是史也者國祚之修短人才之消長圖版之大小生民之苦樂莫不于史焉備之故學之不可不亟也但涑水考亭二書連篇累牘不能讀也卽世所行綱鑑諸本亦未可旦暮遇之者乃因公餘之隙畧掇全史之要而成一編以授二小子使其便讀而已余因是而有感矣曰史不可以不讀然讀史而不得其全焉不可也全史不可以不讀然讀全史而不得其要焉尤不可也試

以孔孟之言推之天下雖大古今雖遙大約有禮則治無禮則亂斷未之或爽也卽以兩漢舉其驗文帝之世禮興刑錯景帝之世風移俗易此一治也成帝之世色湛政亂哀帝之世祿去權移此一亂也明帝之世理法達幽章帝之世除科深愛此一治也桓帝之世五邪嗣虐靈帝之世二宦亡敝此一亂也推之自漢以下自明以上莫不皆然要其所以治者在乎得其禮其所以亂者在乎失其禮甚矣所損所益之不可



不慎也二小子其知之否寶安諸生廖子作魯  
劉子祖啓鍾子大猷林子梧祁子挺瑛造余署  
中見是書歎曰是書也至要存焉莫約于斯矣  
莫博于斯矣其關於世甚大非僅爲小子後生  
助也持而授之梓以公之世余亦不能禁也爰  
序其端末如此

明詩比玉集序

論詩至明難言之矣以其去宋元日近去唐日  
遠也而况漢魏乎高子曰否不然也蓋江河有  
日趨而下之勢挽而回之存乎其人若以世論  
是宋可無蘇黃而元可無虞揚也有明治化日  
久將三百年矣其薦紳大夫以風雅爲業其常  
布山人以吟咏爲事故無體不備也無格不具  
也無調不協也無人不賅也吾樂得其人以論  
其世且樂得其世以論其人焉洪永之際人文



雲蒸青田爲首金華次之時有四傑在吳十才子  
子在閩五先生在粵袁景文張志道劉子高復  
工麗豪拔相與羽翼鼓吹之亦有明之王揚盧  
駱也而明詩初盛景泰之時有十才子名不甚  
著然原博公讓亦聲稱一時成弘之際茶陵劄  
臺閣體含咀宮商吐納風雅學士大夫出其門  
者斐然成章弘正之際文運大啓空同開山大  
復舍筏亦有明之供奉拾遺也邊以典麗徐以  
沉鬱康以勁直二王以蔚藻或稱四傑或稱七

子其時又有東橋善夫升之欽佩魯南諸子彬  
彬蔚起不下十家亦有明之高岑王孟也而明  
詩再盛嘉隆之際用修君采稚欽子業子木約  
之允寧諸子同時唱和亦云聲應氣求濟南婁  
東二先生出劄爲高華宏大之調力追三唐鞭  
弭四海洵稱中原二子而子相子與明卿公實  
茂秦和之號曰七子復有三甫諸子續之廣之  
亦有明之開元大曆也而明詩大盛公安竟陵  
嗣起其幽情遠韻亦足鼓簧一世然學之者不



得其美而得其疵又從而詆毀前哲亦已過矣  
余家好藏書獨少明詩邇購得選部十餘種寒  
暑吟之見其以少勝者于鱗卧子以多勝者石  
倉虞山虞山一本博而核雄而肆其表彰布衣  
尤爲諸選所不及然而持論之意則遠師晚唐  
近效長沙旣擊竟陵復訾何李王李四家不無  
過當也夫竟陵與四家門戶各別竟陵固可擊  
四家亦可訾乎虞山兩斥之而欲以日休龜蒙  
之餘緒奪浣花彰明之果位天下後世豈能心

服哉余與同學陳子篤氏怒焉憂之爰取是本  
採其是者刪其偏者一切險者織者平者俚者  
痛加汰之而連類相附使人與人比如比玉然  
或立門以定格或從地以別派或因時以和聲  
或依品以按辭畧與諸選迥異要以備一代之  
勝續三唐之遺云爾是故有臺閣六家曰劉誠  
意基宋太史濂王待制禕解學士縉楊少師士  
奇李少師東陽有吳中四傑曰高太史啓楊按  
察基張司丞羽徐布政賁有閩中十才子曰林



膳部鴻高典籍棟黃學官佐周祠部位王檢討  
備王典籍恭王紀善褒唐副使恭陳處士亮鄭  
助教定有粵中五先生曰孫典籍黃李義寧德  
黃通判哲王給事佐趙布衣介有洪武三名家  
曰袁御史凱張學士以寧鎰司業崧有景泰十  
才子曰劉御醫溥湯叅將胤勣蘇雪溪平蘇雲  
壑正沈倥侗愚晏御史鐸王處士淮鄒御史亮  
蔣淮南忠金粟公子王貞慶徐處士震有前七  
子曰李副使夢陽何副使景明徐博士楨卿邊

尚書貢康修撰海王宮保廷相王壽州九思有  
後七子曰謝山人榛李按察攀龍王尚書世貞  
宗副使臣徐布政中行吳叅政國倫梁主事有  
譽有後五子曰張宮保佳胤張僉都九一余副  
使應舉汪侍郎道昆魏按察裳有續五子曰趙  
侍郎用賢李尚書維楨魏考功允中屠儀部隆  
胡舉人應麟有三理學曰陳簡討憲章莊郎中  
景王新建守仁有八名卿曰楊修撰慎薛郎中  
蕙王裕州廷陳高按察叔嗣陳副使東蔡侍郎



汝楠王祭酒維楨湯遂昌顯祖有十六名士曰  
石田先生沈周桑柳州悅祝京兆允明唐解元  
寅文待詔徵明蔡孔目羽王貢士寵太白山人  
孫一元盧太學柎徐記室渭崑崙山人王叔承  
沈記室明臣王較書穉登何孔目良俊鵞池生  
宋登春陳徵士繼儒有皇甫四兄弟曰舉人冲  
僉事淳僉事沆同知濂有黃氏兩父子曰魯曾  
德水省曾姬水有張氏二兄弟曰鳳翼獻翼有  
江左四家曰顧尚書璘朱叅政應登王少卿常

十七

陳太僕沂有楚中四家曰袁稽勲宏道儀制中  
道鍾提學惺譚解元元春有閩中八家曰鄭郎  
中善夫丁戊山人傅汝舟卧芝山人汝楫曹南  
宮學佺徐舉人燧布衣爍白雲先生陳昂宋秀  
才珏謝布政肇淵商秀才家梅有粵中三家曰  
黃少詹佐歐郎中大任黎叅議民表其目二十  
其卷四十有二其人一百一十有六總曰明詩  
比玉集



明四大家詩選序

明蓋有先後七子云說者曰弘正之間北地信陽起而掃荒蕪追正始一時並興之彥蜚聲騰實或嘔或歌此前七子所以揚丕基也然二氏分流勁者樂李雄高秀者親何明婉風調不合又三四十年然後濟南婁東出而通兩家之好運材博而搆會精荆棘除而塗茨新此後七子所以揚盛烈也高子曰有是哉夫詩衰於齊梁而唐振之衰於宋元而明振之明詩余論之詳



矣大抵趨所必至者時也變而通之者人也國  
初人文鬱勃時則浙有劉宋吳有四傑閩有十  
子或綺縟有體或峭拔有致或冲素有韻或工  
丽有格然其時草昧雲雷仍有鬱而未舒之恨  
唯我獻吉命世雄才洞視元古詩文一振雄顛  
莫比復有仲默毓秀瑰丽相與匹配余聞李源  
風者也何源雅者也二子相得真所謂有親可  
久者也夫弘德之間治化昌隆二君子唱之諸  
大夫和之昌穀摘藻於琴川廷實揮毫於歷城

德涵按拍於武功子衡樹幟於儀封敬夫唱曲  
於鄆縣何彬彬也嗣後風氣稍變餘韻未遠于  
鱗唱起歷下詩非天寶不談文非西京不講亦  
一空同也其睥睨千古壓倒一世真有白雪寡  
和之歎復有元美於書無所不讀於體無所不  
備其取材若良冶操鑪鞴其運用若孫韓用官  
嬪古來著述之富未有如弇園者兩人相得驩  
甚畫地南北稱伯桓文顧其推尊李氏則曰漢  
家兩司馬吾世一攀龍卽少陵尊太白不是過



矣爾時京邸倡爲五子七子之社聲氣抑何廣也徐子與天目才人宗子相廣陵騷客吳明卿甌洞名士梁公實嶺南逸品至若謝四溟山澤之雄耳樂府一出諸侯王傾動之名妓女歌唱之又何驚絕一時也夫弘正嘉隆之世上下近百年矣有十四子者羽翼鼓吹之其音調氣格當在初盛十二家之間然十四子之中又不得不推獻吉大復于鱗元美爲李杜矣號曰四大家爲明一代之勝今諸詩俱在備之則廣矣大

矣選之則美矣善矣此余與余友陳子篤氏意也自是以降而明無詩



訥園詩序

十五國風不採閩音古之時然也自唐以後駸駸盛矣歐陽行周始開風雅已爲昌黎所欽重嗣是而楊大年胡五峰蔡忠惠真西山劉後村黃勉齋先東溪謝臯羽陳衆仲諸人以詩鳴者指不勝屈也明則林子羽春曉孤雁二詩名重三都家漫士品彙正聲二選體崇三唐當時門徒唱和聲應氣求或稱五人或稱十子彬彬如也繼而少谷沉鬱汝舟蒼黝石倉清麗興公蒼



翠衣鉢相傳三山一派石齋唱漳浦東厓唱晉  
江世稱二黃互爲埧篋亦旣獵秘搜奇窮綺極  
繡矣今復有訥園先生其人渾金璞玉其器峙  
岳流川其賦絢日凌雲其詩瓊花烟月殆得石  
齋東厓家學而發揮光大之者也諸詩具在設  
有嗣尼山而採風者不知登之風乎抑登之雅  
乎抑登之頌乎今之時然也訥園生閩閩家少  
有才名嘗結廬輪山之下泛舟浯洲之上其錦  
囊中所得當于篆烟輕裊窮島殘波乎求之余

與之里閭相接渴其名未握其手每讀兼葭秋  
水之章未嘗不廢書三嘆也午未申三載作燕  
門之遊余樂得訥園爲師訥園亦樂得余爲友  
各恨相見之晚也爾時有阮子疇生詹子莪士  
者詩豪也訥園之與此二人者友也以詩故也  
余亦得與之通交焉凡我四人者結構爲文章  
度雁漠走雞林我唱汝和汝唱我和聚首燕市  
謳歌之聲不輟也其樂無央爾時都門有四子  
之稱已而余承乏于寶安疇生設教于金臺莪



士卜隱于潮陽訥園分憲于零陵矣出處參商  
河山迥阻未嘗不泣數行下也然而尺牘之來  
往也長短句之酬答也又不減燕市聚首時也  
余因是而有感矣夫零陵楚地也有明詩派始  
于劉宋諸子繼于北地信陽盛于歷下弇州赤  
幟一立天下同風篇篇漢格唐什也乃一變而  
爲譎詭葩蒙之習再變而爲纖巧顛頽之調實  
公安竟陵爲之濫觴也今訥園觀風于楚其俊  
語亮節高情前致真足以移風易俗而無難者  
以之振閩音焉可也以之變楚風焉可也余故  
於是刻而樂爲之序



葛亭詩艸序

天下奇士失於咫尺之內得於萬里之外者何  
限古今異書失於生平之久慕得於一旦之驟  
遇者何限吾於子篤陳先生見之矣子篤與余  
同里閤少未相識也丁未春獨荆蓋於都門子  
篤家貧甚不能燕遊也其能燕遊者蓋其家企  
山先生偕之行也企山與余文字之交深於肺  
腑在京邸無日不過從余因是得見子篤云一  
見卽以一瓣香事之余嘗有贈詩云有客漳之



浦定交燕之塢真所謂天下奇士失於咫尺之內得於萬里之外者天下人將淺視乎余也子篤好讀史亦善作賦好修文尤長吟詩詩有數種總顏曰葛亭從梁山所居而命之也里居嘗爲李寶弓張次巒諸先生所推轂其自閩之越之吳之鄒魯之燕遇名山大川古蹟人物多所吟咏今諸詩具在有採三百之音者有啜十九之味者有吸三曹之氣者有探陰何之髓者有揚鮑謝之瀾者有鳴沈宋之韻者有具李杜之

骨者有噴西崑三十六體之唾者不鏤混沌之鬚眉不盜淵岳之鑄鑰不幻秋容之蕭瑟不流素魄之澄鮮卽杜樊川許丁卯常浣花諸集瞠乎後矣而宋以下無論焉余嘗有贈詩云聲高萬木低氣悍百獸觸此不過畧舉一二耳豈能盡其涯涘哉一讀之而快再讀之而悟三讀之幾不知乎足蹈手舞矣真所謂古今異書失於生平之久慕得於一旦之驟遇者天下人又將重視乎余也子篤自燕歸卽杜門梁山之下以



平生可笑可啼可莊可詭可嘯可歌之事一一  
發之于詩自唱自和不輕示人余承乏寶安以  
千里而來日望羅浮夜遊東湖增吟數十首併  
前後諸什以千萬計然子篤家貧甚不能剗劂  
也余捐薄俸爲召工梓之子篤不可蓋疆而後  
可云刻成連篇玩之其糾網旖旎之思岷嶂  
崩之骨菜郁蘭蒞之香灼爍芙蕖之色當有與  
羅浮東湖流連數日而不忍去者

素園詩序

素園陳先生蓋嘗序余詩文云余不佞待罪東  
官得辱交素園甚驩今冬素園亦出所爲詩數  
卷相示余讀卒業見其瀏然而清冲然而恬整  
麗閒雅追漢魏繼三唐作而歎曰素園之于詩  
也良工心苦矣夫詩有聲有色有局法有風神  
聲欲其韻色欲其禱局法欲其圓風神欲其逸  
必備是者而後可云操休文之矩獲入浣花之  
閭域今人稱詩類皆得一二奇字險句自詫吟



伯求其全體無當大雅卽今之讀人詩亦以爲  
奇字險句足稱異材焉嗚呼詩道如此設以李  
杜王孟之篇謬爲亡名氏之作示之其必茫然  
無辨且竊竊焉笑爲不工也已粵自五先生之  
後黃梁黎歐與弇州滄溟共分一席至今猶彬  
彬郁郁素園家學淵源於書無所不讀成進士  
出宰宜章厭簿書煩苦賦歸去來高枕丘園菘  
花蒔竹其品格似陶元亮故所爲詩瀏然而清  
冲然而恬整麗閒雅局法風神聲色無一不備  
不屑屑于奇字險句余咏斯猶斯舞敬誌數  
言蓋將使天下後世知余之善讀素園詩耳不  
徒謂報素園序余也



寶署園林記

邑舊名寶安自唐改爲東莞山川人物旣詳在  
邑乘矣署在壬峰之下其周圍蓋有二百五十  
丈云大堂居中兩廊翼之前有譙樓後有小山  
均可登眺望遠也宅舍有數層翬翼相次稍東  
有小塘又折之西北亦有小塘若相敵然以夾  
小山之左右塘雖不甚深然得膏雨時降亦有  
澄波廻瀾之致此寶署之大畧也署之東有丞  
有史其西有簿自簿官經裁之後其舍鞠爲茂



艸矣但其地附庸縣衙之西咫尺相通背後有古榕一株鬱鬱盤盤垂蔭數畝其上有雀鳥棲焉以數百計朝夕爭噪夏來冬去年年不爽也問榕樹由來則邈乎不可考矣稍後又有數樹連蜷相樛雖溽暑不見熱狀亦一幽勝也其南有地廣衍可爲射圃卽謂之園林誰曰不宜戊申秋余待罪寶安時新安歸併二邑冲繁又值內差大人奉命來展邊界藩憲各大人巡歷所治軍公旁午不能偷半晷閒也越庚戌秋乃

廿九

于簿署舊廳三楹畧爲補葺顏曰敬齋余友詹子明章爲之記旁又築二小廳以酬客也廳後築一小亭以篷爲之顏曰榕亭余嘗咏二律以紀其勝其曰一篷當瓦蓋兩板受藤封言工之省也其曰鳳臺吹短笛旗嶺落輕鬟言景之近也稍西又構一茅亭不方不員凡六楹東南可眺黃旗東北可望羅浮又東與學宮相對學故有古松數株蒼蔚奇兀殆與古榕相映云其北以磚築小欄欄下近塘更可時時聞流水潺也



欄之中監小坊顏曰北塘余有所撰述曰北塘漫錄者此也政事之暇嘗息遊于此此非 聖天子治化翔洽海晏河清安有此邑之又安此園之菁蔥哉園成爰掇管記之

高氏始祖名賢東溪公傳

公諱登字彥先生於漳浦縣九都移居東溪之上因自號東溪云父時中母陳氏宋徽宗崇寧三年甲申正月初一日子時公生十一歲而孤讀書日誦數千言及長究極理義持身勵行旣冠遊大學交遊皆一時之彥欽宗靖康初年犯京師六館之士皆遁去公曰君在可去乎與陳東等詣闕上書乞斬六賊時廷臣復建和議割三關奪李綱等兵權軍民不期而會者數萬



王時雍縱兵欲殲之公等一十人屹然不動時方擢吳敏張邦昌爲相敏又言相李邦彥無辜乞復用公於二月十六日登聞檢院上書不報二十二日三月初一日二十二日五月十一日又上書俱不報紹興二年上駐蹕臨安公以十事投時相不行遂於廷對盡言之初考官林叔豹得之喜曰非魏科莫處之覆考官忌其直列作文理紕繆與陳之茂等一十九人授下州文學尋有旨附第五甲公任廣州富川簿憲使董

奔聞其名檄讞昭賀廣籐潯梧六州獄有囚殺人甚明守欲奏裁曰陰德可爲公曰陰德豈可有心爲之殺人者而可幸免則被殺之冤何時而銷復命兼賀州學事學故有田自舍法罷其田歸買馬司公請復其舊守曰買馬孰與養士急公曰買馬固急矣然學校禮義由出一日廢衣冠之士與堂下卒何異守曰抗長吏耶公曰天下所恃以治者禮義與法度耳旣兩棄之尚何言守不能奪卒從之秩滿士民相率餽錢五



十萬太守勸其受公辭之不可遂請置書藏於  
學歸至廣會新興大饑檄發廩賑濟復爲糜於  
野以食之願貸者聽所全活萬計紹興八年赴  
都堂審察遂上皇帝書及時議六篇并序上覽  
之索六議送中書秦檜怒其議已不復以聞授  
靜江府古縣令道出湖州湖守汪藻館之留與  
修徽宗實錄固辭或曰是可以階改秩公曰但  
意未欲耳遂行公至靜江府帥沈敏曰何以治  
古縣公條十餘事沈曰是古人之政今日之詐

恐不可行對曰忠信可行異域謂不能行是誠  
不至耳但某不差人下鄉亦願公不差人下邑  
沈曰謹奉教公以廉勤公仁四字自誓寬期限  
以追呼新黷官以勸學吏無所容其欺風化盛  
行不嚴而治時胡舜陟帥靜江謂公曰古縣秦  
太師之父舊治太師生焉宜立祠公曰檜爲相  
亡狀祠不可立胡怫然曰汝欲爲好人耶公母  
病甚申乞舜醫不待報檜怒奏請旨諸路提刑  
跟捉送靜江府勘舜陟徑遣挺卒捕公時大夫



人已死舟中公聞有捕命卽殯水次屬之家人航海詣闕上書求納官贖罪以終身上覽而憫之送中書施行公友人有爲右司者謂曰丞相云嘗識君於上庠倘一見之終身事無憂矣上書徒爾也公曰登知有君父而不知有權丞旣而中書奏無納官例送理寺下靜江府獄公號泣而歸檜密捕不獲塋母畢詣靜江府勘所舜陟先以事下獄死矣得事白以聞勅還家公至廣漕司鄭鬲趙不棄辟攝歸善令其秋因差考

試潮州公憤權臣專恣出題皆撫經史要語論直言不聞之可畏策閩浙水災之所由時丞相趙鼎在潮謂公曰天下主文多矣未有如公忠誠愛君者郡守季廣文卽馳以達檜檜怒坐以前事取旨編管容州自是天下以言爲諱南省至揭公名以爲考官戒初公出潮陽試院遂歸舊隱與學者講論忽州遣使臣謝大作持省符至公讀畢卽拜謝上馬謝曰少入告家人無害也公曰君命不敢稽遂着鞭而行謝愕然比夜



巡檢領百十人復至兵刃森列公曰朝廷若賜死亦當拜勅而後就法謝感忠義爲之泣下以死捍之公到容州種蔬植竹爲終焉之計四方士執經者數百人大講明大學中庸之道方教行窮微而公薨矣是時紹興戊寅也後二十年丞相梁克家漳守何萬上之朝復其官後五十年朱文公熹奏贈其官贈承務郎又爲之祠記其學以慎獨爲本所著有家論等篇及東溪集若干卷

一世祖祿成公傳

公諱宦號樂成後沿爲祿成宋名賢東溪公之後也生于宋末年愛人好施勤心修煉自元中造偕弟祿治擇地際都之村漸營棟宇爰立世業前面五鳳後背雲蓋山靄下連海波中環蓋漳勝地也其人樸而厚其俗龐而有禮公定基于斯嗣忠清之風立百世之業繫吾宗不祧之祖也嘗遊雲蓋之寺生二子卽以雲蓋命名其志大其業遠矣祿治一派擇居于九節橋頭去



高氏譜傳五  
澗都五六里許

家史氏曰國制於翰林院置館錘鎔庶士簡者  
碩爲之師其讌室則師弟子退而求之地也有  
軒軒然疏寮洞牖命曰成樂蓋聖人之言曰成  
於樂樂育者徵德焉故名之也我公愛人好施  
勤心修煉卽以樂成名其預知後之孫子有能  
讀中秘書稱 天子文學侍從之臣者歟

二世祖雲甫公傳

公諱

號雲甫祿成公長子也祿成公有子二

公居長蓋甫公其次也我公當元之末造守不  
仕之高節獨棲遲於山水間澗水淪漣與月上  
下澗山遠火隱見林外村墟夜春復與疎鍾相  
聞是中有深趣矣公其丘壑夔龍衣冠巢許書  
篋几杖之外殷殷留金石聲歌焉咏焉以貽厥  
後

三世祖添祚公傳

公諱 號添祚雲甫公仲子也公之行之事以  
世遠故莫之詳也兄添祚弟添興爲之後先而



疏輔焉者公也公有子三著祿著仕著美世有  
哲胤而巍然高第爲吾宗發祥之始者著美之  
後也公之後也其兩薦科名行且繩祖武而上  
之者著美之後也公之後也前後拜闕里堂下  
者三十多人於公有光於族有光公之孫支族  
私稱官房士者勤以致貴繫曰惟公之賜農者  
儉以致富繫曰惟公之賜

四世祖著美公傳

公諱才號著美添祚公又仲子也兄二長著祿

次著仕族皆以述德稱之至公獨以名斥之公  
毫無介意也生一子則完父老傳公後當軍於  
楚在軍生興興生德美稽之弘治年間譜牒及  
契書猶昭然可據族衆多矣公何以軍曰是其  
好義勤公者也族之長不以爲好義也而推轂  
焉輒以爲孱弱也而驅使之公亦有遺憾焉於  
戲士君子屈於一時而伸於百世戮力於生前  
而食報於死後者亦多矣公平何憾今日之貴  
於朝富於家巍然爲郡邑望族者非公孫之子



若孫耶而其成效畧可觀矣

五世祖樸庵公傳

公諱則完號樸庵著美公長子也公德行事實不少概見大抵農圃中惇愿長者也生於永樂丙申卒於成化己亥壽六十有四塋於庵堦離滌山一里許坐巳向亥娶連氏塋於杉林坐午向子生子四長乾緩三傳而星散于泉與潮之間次乾忠僅一曾孫而着伍於永定四乾輝有曾孫宗周流於潮祖周流於靖獨學詩一派十

有餘人分住於沙塘與滌山烟火相望惟叔子乾育卓卓乎若鶴立雞羣一傳逸叟公高年碩望二傳滌山公汨山公駸駸稱盛矣下此而科第接武衣冠濟添為吾族靈光行且昌熾未有艾也後之議者曰公有丈夫子四俱稟於鳩鳴而食報不同豈其質有厚薄故傳有修促歟曰天之生物必因其材而篤焉栽者培之傾者覆之天之道也

六世祖坦庵公傳



公諱乾育號坦庵樸庵公叔子也有兄二乾緩  
乾忠有弟一乾輝公在農圃中用天之道分地  
之利耕耘蔗袞黍稌而巳嘗往來鳳山之下杖  
履間風神肅肅可無俗氣每語人曰吾徒江海  
之士擊壤鼓腹輸太平之稅耳帝何力於我哉  
娶洪氏生一子精華當諸宗齟齬之日公獨能  
卵翼一子相與周旋可謂利方爲員破介爲和  
者矣生於景泰乙亥卒於嘉靖甲午年八十矣  
子若孫將塋公於深山之下諸宗阻之扶柩於

山之巔塋焉竟以此得吉穴產佳胤天殆憐公  
而報公乎地名石佛遊圭海者往來劉覽焉

七世祖逸叟公傳

公諱桺號精華坦庵公長子也公至性樸厚飲  
人以和族以內藹如也族以外溫如也公無他  
兄弟諸宗時起齟齬之公獨以和處之于于如  
也唯是清素勤儉多積遺德以有今日語云不  
於其身則於其子孫今日載筆承明之朝爲天  
子史臣者非公子之孫耶其兩登科名行且射



策金馬門者非公孫之孫耶諸孫支厠名學校者三十餘人今將搏鵬翮而上焉者又不可勝數也生於弘治己酉卒於萬曆癸酉私謚逸叟壽八十四齒與德並尊宜其享無疆之報哉古院之山庚坐甲向崇崗秀鬱山川英氣鍾焉公其安於斯瞑於斯以觀後世之日昌隆也夫娶吳氏與公同塋公在右吳在左

八世祖滌山公傳

公諱隆字益謙號滌山精華公長子也祿成公

以來世稱推魯公生英敏飾以儒服精華公喜甚少治舉子業試屢不利輒安以命翱翔於鳳山之下稱有隱德弟汨山治生頗富公安貧樂道人也訓靜吾公以詩書一切生業置焉不問靜吾公授業太史公皆公教也處世以樸直為主族以內得公一言重於連城里中事有不平者每質成於公而去家世勤農而公輒敬士生平善善長而惡惡短尤好赴人之難周人之急性自天植至老不衰繇是以德行聞於鄉國家



鄉飲賓之設所以尊者年褒懿德也固卽以袒割饋醕之禮推而行之郡邑間博學青衿共射利於富豪古禮失矣鄉以公名進澄邑令公往逆之飲公於賓羣稱得人時公年七十餘矣高年厚德公殆兼之太史成名之日其奉母南旋也時從靜吾公侍公膝下父子祖孫稱觴上下天倫親至致足樂也娶謝氏生存愛繼娶蔡氏生國猷生于正德戊寅卒於萬曆戊戌年八十二矣私謚毅叟太史爲之執三年喪公卿弔者

溢於市誅章難以枚述更爲之治墓於神童山公有厚德應有厚報哉

曾大父贈太史公傳

公諱存愛字靜吾原名曰仁溧山公長子也公生八歲母謝見背哀毀不欲生時王父精華公携而泣之如禮已事繼母蔡盡孝蔡煦喻子之閩以內無違言自精華公以上推樸孱弱屢爲豪齟齬至溧山公緣飾儒術業稍稍振公生而修幹顛履雋穎絕倫里中老父謂是子也才足



亢而宗矣旣而寘力於詩書數奇不遇而太史生甫能言嘉其了悟日討而訓之朝指授而夕吾伊字批句櫛悉公自裁定開塾延師具程束而已太史秉燭夜讀公嚴坐督甚力時漏下三鼓矣雞初鳴搔其首誦所習書乃攬衣起以爲常云太史年十二時學使者試第一以褐衣入棘闈公課舉子業不當意輒憂楚太史涕蘇蘇下也母曰休矣寧有十二齡登鄉書者母見卯遽求時夜公恚甚持挺逐母良久乃已時王父

所遺僅負郭之田數頃粥一區復粥一區幾烏有矣公弗爲念也或勸之徙業公曰吾饑以當食寒以當衣疾痛以當參餌強侮以當解紛吾方課子不暇子趣去太史戊子舉於鄉壬辰成進士癸巳迎公與孺人入京邸見太史攤書不輟誦且勞曰孺子以詩書起家無忘故業夫摻槩而稱儒臣匪筭墳典而握珠璣未免代斲孺子鄉者憚而父課若嚴乃今政患課不蚤耳勉旃無何而公辭歸矣歸則事父母修菴臚之養



立義倉以賑宗戚之貧者不修容不修郟第日  
課叔季諸子治經猶故公倜儻有大節遇人之  
難傾身爲之甚於已里中事有不平者間就公  
質成俱娓娓各當其情去羣歌舞之矣乙未太  
史休沐歸里時與公及滌山公前後稱觴人稱  
福祚丁酉太史治裝北行而叔子以餼入胄監  
挾與偕公送之二百里許握手趨起淚下如雨  
是夏染疾不起終於正寢享年僅五十有五與  
蔡孺人相距僅十日太史入都席未及溫計聞

擗地泣血疏乞終喪六年

朝議憫其孝從之

鄭憲副懷魁云先生入索旁通一經立訓懷伏

櫪之志間肄神駒具摩霄之骨時習威鳳太史

珪璋帝室鼓吹休明入秘閣以繙書饗官厨而

思養時近二親之至咸躋五十之年京國同儕

杯觴爲壽上古之椿可圖南陔之蘭方擷况乃

堂有垂白之老門多拾紫之英方逝膺乎天眷

卽重快乎雲飛何意暫離於焉永隔離雌雄之劍

並失闔津牝牡之珠雙沈海浦太史方心悸於



國災輒神銷乎家禍抗疏終喪願逾恒制兼銜恤於二人庶枕苫乎六載斯荼毒之極哀寔蓼莪之至性矣此語蓋實錄也公有丈夫子五長克正翰林簡討次克萃欽依遊戎次朝彩明經別駕次朝章克夔俱庠生公自銘齋云冰蘖承家叨聖代逸民靜看乾坤娛歲月詩書課子養名世奇才期膺甲第佐朝堂蓋公之志也癸卯春 覃恩贈公翰林院簡討配蔡贈孺人合葬於靖邑員山古湖之麓

先大父太史公傳

大父太史公諱克正字朝憲號衷荃別號蓼庵贈公靜吾長子也生於海澄之滌都穎異絕倫稱聖童贈公尤嚴督之八歲能屬文九歲試有司受知邑令王公乙亥年十二督學胡公定自舞象奇之試第一命酒脯慰勞之食餼於邑丙子省試當道人人願識寧馨兒自是郡邑選試御史觀風試輒第一督學趙公參魯試又第一侯孺人祖參戎公爲孺人擇佳耦見公郡試延



入喜曰孰是兒也而露頭角遂以女女焉萬曆  
戊子舉于鄉壬辰成進士爲易一房第一人主  
者錄其經義以式多士偕劉任之韓象雲沈銘  
鎮諸公同與館選稱庶吉士館閣試輒第一癸  
巳迎贈公太孺人就養邸中甲午授檢討值詔  
求直言公發憤欲有匡正艸具矣後以上書者  
多而止同館疏請冊立東宮公所起艸也今猶  
多誦之者尋奉命纂修國史公著作金馬門追  
龍門扶風之遺稱良史才乙未乞沐休奉母南

歸王父王母在堂二親尚托子舍偕諸弟子而  
舉重闈之觴人稱福祚族富人有所爭繼者上五  
伯金爲壽乞公左右祖公峻拒之丁酉沐滿還  
朝所過遍游諸名山輒多賦咏甫入都而二親  
訃至慟哭仆地上終喪六年疏哀痛特至天子  
憫其孝下部議主者以先王守禮原不可過特  
許加二年在籍以展孝思報曰可公家居守制  
茹痛未瘳戊戌重以王父之喪雋弟之憾積傷  
成瘁積瘁成疾伏枕經年幾無以爲生以藥代



飯調攝復生者孝所感也時貂鎬高家權政海濱勢豪甚顧雅慕公因有司致殷勤公拒之不肯寸武相過亦不肯尺刺相通其節搯類如斯見羅李先生材載道而南揭止修大旨講學芝峰之麓公與朝夕討論率諸士受業焉爲作正學堂記他若造虹橋濬頰渠日與郡守韓公擢鳩工斲石植表疏築翁郡人文斌斌伊公賜也辛丑營佳城於郡西員峰之麓墓二尊人壬寅強起赴闕經會城適張嶷有海外徵金之疏事

下閩中貴人主之中丞徐公學聚詢採金事併會題奏稿示公公上採金海議三以杜鄉曲中丞謂公生長海濱周詳備至一一如公議事遂寢癸卯春覃恩贈贈公官如公官母蔡爲孺人授階徵仕郎封侯孺人公喜且泣曰安得吾親躬拜此命服者秋奉命典浙江試矢公矢慎大稱得人陳太史萬言其榜首也甲辰計偕獲雋者十冠本房者三前後得第者以半計先是公至闈矢意爲國家得人而又私計多士如林



竟難一舉首賜以九迴已得陳君爲第一喜動  
顏色副考給諫梁公有年時有齟齬公爭之力  
曰倘有不愜某以一官狗之無爲溷乃公也旣  
徹棘所收盡當時才士而陳爲後來詔令之冠  
然忌者益用蜚語中公矣公出少宰周公應賓  
之門周與四明相國沈公同里閉炙手可熱而  
公飄然霞外於政府了不自通周又與院長唐  
公分門而構院長鍛周衣鉢遂首及公四明相  
又以公不善媚不爲湔雪乙巳大計院長遂指

公罪案謂公弊中妾兄弟沈萃楨杞楨而公無  
他侍妾繼有王御史疏議姚給諫士慎追其始  
進倖中之弊時姚公已聯捷選館擢居天垣矣  
少宰楊公時喬暨諸同事者知公無端受釀力  
爲申救推補粵東學憲當時下石者之意別有  
所爲而波及於公公貽大司寇趙公心堂書曰  
科場重典也媒孽者反借此以行其私此其故  
關係頗大中間與旨未敢顯言全館者過憚之  
公亦不之辨也慨然曰丈夫何地不可自樹何



必戀戀金馬門第恨以廉貞而蒙謠詠耳臬憲之推待命未下忽遘王母之變報劉抱感旋卧病乞歸家居未二年貝錦之子人骨已死公論已明公差自憫解也楊少宰補牘疏薦公文學著譽厭薄外僚等語蓋欲虛史席以待公也時福唐葉相國向高溫陵李相國廷機並入秘閣與公友善屢貽書勸駕公竟不出矣諸生執經問業每課文第其甲乙彈射之士倍矜奮丁未構斗室於郡之東偕蔣宮論孟育戴學憲燦徐

職方鑿鄭觀察懷魁林大夫茂桂陳進士翼飛張孝廉燮十三君子結社於芝山顏曰佺雲詩社一時風雅爲漳先聲已酉八月偶中風疾卒前一日有大星墜於里門蓋其應云年僅四十有六朝野咸惜之公會自述云維桑梓之地何氣意可以加人苟名節所關卽銖銜若將浼已督學譚公世講採爲語錄崇祀於鄉載漳州府誌所著有玉堂初稿四卷木天遺艸二十八卷行於世維檜伏讀遺艸貽劉任之書云方今操



觚家無不尸祝柱下漆園及先秦西京以上者  
居嘗布鵠則歷下瑯琊新安實居前矛至推毗  
陵而爲之下邇取毗陵全草讀之乃爽然自失  
蓋歷下諸公瑰奇其格琳琅其音纒纒洋洋亦  
稱大備要以卽事生境卽境生情着意無意不  
法而法莫如應德公歷下諸公猶可剽竊毗陵  
則無嵯岸可尋歷下諸公猶可摸擬毗陵則非  
鹵莽能到余偶有所見亦爲應德吐氣不可令  
壇坵之上少一應德也公晚而持論如此

先府君太學公傳

不孝維檜序述先德至我先府君太學公輒淚  
簌簌下哽咽不能言云壬辰公車之役值霞郡  
岸谷之阨炊骨食子比屋呼顛府君食舊德垂  
老矣竟坐危城以隕蓋傷於遇云先府君諱元  
洙字師鼎號道原後號景憲大父太史秉荃公  
長子也太史公有丈夫子三府君居長次陪貢  
生元濬次五經博士大捷戊子春三月府君生  
於溱都太史公遽命人懸弧喜曰佳兒必大吾



門是秋太史公遂舉於鄉大母侯孺人倍拊愛  
焉非其長之謂也太史公壬辰魁南宮讀中秘  
書迎贈公太孺人就養京邸府君侍焉每宦遊  
挾與俱遇吳越佳山水輒多賦咏太史公善之  
謂繡佛手丁未太史公築室郡東府君入爲家  
督巳酉入參知林公汝詔門是秋太史遽遊廣  
莫之墅府君茹痛欲絕癸丑繼入少保戴公燿  
門少保曰高郎疊疊迫人真蘇瓌子也壬子督  
學馮公錄入澄庠乙卯上遊國子監酉戌卯辰

949

若而年時往來於燕趙吳越間薦紳先生暨通  
家所贈遺者輒置書籍器玩而還叩其橐中無  
有也府君之居郡東也四十餘載逍遙城市足  
不履公門有避世墻東遺意胸懷瀟洒磊落不  
羣其天性也憶昔之隨太史公南還也以山水  
廓其心胸長挾策入成均也以天下士善其嚶  
鳴其車轍半海內也以世好締其盍簪其輟舉  
子業也尤搜獵百家及方外諸野乘嘗自作詩  
文傳記以伊吾聲作歌詠其家居也阿堵牙籌



置焉不問歲之豐稔聽之天出入之多寡聽之人而已時而離羣索居終歲不延接一人時而漫滅懷間之刺與所不知者嘗吾技時而鮮車皂蓋博袖峩冠以逞其豪上時而不衫不履不阡不陌以托其風流每語人曰不夷不惠之間居身之珍也生平不分冰灰於胸中不設雌黃於舌端不生風雲於掌上一切可驚可愕可憂可喜之事不足動其中其懷葛氏之遺耶至其善守先人業與人交無顯晦服父母喪終其身

首所戴者皆素而足不履朱朔望具冠裳拜跪如禮又恂恂古長者風也府君居郡東舉維松維桐維檜維檀兄弟四人丙戌鼎革之交携家歸溱都丁亥復入郡東己丑維檜補弟子員辛卯登賢書府君且喜且誠曰士公車前身屬之師公車後身屬之君惟公車時無所屬踰檢而喪志自此始矣而其勗哉壬辰府君以齒德爲郡有司延飲於鄉未幾海寇圍城凡七餘月餓孳盈城府君初處危城猶以吟咏爲事八九之



交四壁交困維檀行道中暴卒府君以痰疾臥  
 床蓐幾三十日維檜計偕南宮乘亂家歸侍湯  
 藥僅十日而府君逝矣痛哉享年六十有五所  
 著有壁觀居詩集及近所撰古文辭若干卷藏  
 於家黃徵辟以陞為之序府君歿三年維松補  
 弟子員又二年維桐補弟子員又三年維檜吏  
 部考授推官又六年改選東莞令又二年 覃  
 恩贈府君官如維檜官

南圃行業 詩集

閩漳高維檜西懷甫著

五言古詩

梅花歌

今年春色早百花各吐萼獨有上苑梅偏映池  
 中閣黃鶯啼不任白雪滿山壑折與驛使去隴  
 頭差不寔我今嶺南任先在梅嶺泊新妝妬粉  
 黛清香還魂魄更喜羅浮近美人嘗入幕師雄  
 僊郎客酒肆聊共酌不見月中人但聞梅花落



陳子薦社兄携葛亭詩集入粵余讀之驚

賦

有客漳之浦定交燕之塢躡屐嘗過我相對若  
蘅莊問君何所有上下可千古賦固祖相如文  
亦稱韓愈史則兄馬遷詩乃姊杜甫葛亭諸詩  
在可為知者告聲高萬木低氣悍百獸觸彼從  
性情出詩脾漾酒趣羅浮四百峰君詩與連續  
白雪今寡和繼者陳子薦

閱七閩高言集喜得趙雙白玉美厥二子

詩

閩詩開宗派子羽與漫士發響過龍門引商驚  
下里繼有鄭少谷娟艷如蘭芷石倉諸子出沾  
沾各自喜三山振風雅諸郡皆姊姊漳有佞雲  
社先輩十三子石齋唱漳浦詩文世無比今有  
趙與王詩壇之翹楚摩詰新聲吻松雪舊機杼  
間作中晚調不吐亦不茹快閱董田選品藻多

新語尋梅復採葛寄興遣餘緒

萬曆中先秉荃太史與蔣宮論

孟育戴觀察燥張進士廷棟張大夫廷榜徐職方鑿林大夫茂桂鄭憲副懷魁陳進士翼飛汪



山人有洵張徵君燮吳御史家陳山人範結社于芝山之麓署曰佺雲詩社號十三子載漳州府志

讀宋藝圃集李子田先生所選者

順陽李翰林踈狂似太白是豈其苗裔不阡亦不陌作詩乃磊落中州俱辟易獨恠選詩手拘拘守寸尺宋初有作者多做西崑劇介甫一變之詩聲甚藉藉少游山林派魯直學士格文潛風人旨無已寒鬼魄凡此六君子分却東坡席美哉東坡也眉山兩白璧嗟哉東坡也名成世

所謫理窟首程邵出聲皆天籟解騷推考亭尤爲詩人最茶山嫩無力寒瘦如乞丐務觀頗自放洗削落急瀨永嘉四靈人開芟彼蕭艾文疊兩山氏嗚咽真無奈有宋三百年或譏之曰糲余亦有一評骨刻而體泰質之李翰林藝圃爲茗蔡

讀元藝圃集

元音何孌孌藍出自長吉又沿以西崑厥聲多蕭瑟間入於膚俚不害其樸率至大皇慶來代



代有隹製屈指風雅士范楊與虞揭中發俊逸  
語氣色猶雄麗天錫鴈門產出吻響而細更有  
余廷心忠節真可涕何減宋末人沙漠結詩帶

七言古詩

與陳子薦訂明詩比玉集成漫賦

陳子燕遊回未久眼空一世才八斗書有五車  
田半畝邇者來粵與我聚首擷精文圃採華詩  
藪滄浪之論曰詩貴有別趣其實主聲格立論  
乃不朽明初有詩人解王與劉宋或者似國風  
或者似雅頌其次四傑與十子吳閩之音均可  
誦長沙一闢臺閣體諸子學焉知所從此時初  
盛交詩律大一統嗣是弘正暨嘉隆先後七子



羨且富沉瀨李空同俊逸何大復精麗李觀察  
 雄博王司寇主持風韻近百年聲格直與古唐  
 壽三甫五子繼其間結社唱和如蘭臭公安一  
 變弱矣反以為秀竟陵再變俚矣却不似瘦我  
 欲與子審其篇辨其句考諸古唐而不謬附陳祖虞  
 子薦氏○比玉集成高西崕先生以長句見示  
 賦此奉答○從來鄭聲亂大雅海內何人稱作  
 者君侯把筆橫九州直欲方駕枚與馬挑燈每  
 對畫欄前城頭啼鳥尚未眠卷卷牙籤抽錦繡  
 字字銀管共丹鉛宋元豈足嗣唐響有明一代  
 差堪賞即如洪永猶委靡正風斷自李何始厥  
 後繼之惟王李手執赤幟麾諸子百年摘藻皆  
 英豪試為定論析分毫滄溟何似弇州大信陽

五十五

終輸北地高啓禎之際才亦有可惜元氣入寒  
 瘦險竊篠驂為靈珠俚把鉸釘奉弊帚夜半但  
 聞歌楚聲酒酣未見叩秦缶狂瀾潰川急障之  
 眼看矯枉又一時拮擊竟陵無不可排擠嘉隆  
 欲奚為嗟予閉門生白髮破琴厭奏高山闕竭  
 來將登四百峰得眺君侯署中月君侯君侯吟  
 白雪比玉編成源流別大者如斗小如玦持與  
 天廟琬琰列世間鼠璞敢啼別

丁明汲廣文初度

寶安之東琥珀坑者千家人烟寒東野常見馬  
 山當頭嘶又有羣丘如虎下山邊小塢三十六  
 中有池塘蔭桑竹月落日出烟漸散行人陸續  
 走幽谷池傍古井穿石室灣處若與潮水通池



底有鯉三五尺或疑蛇龍恠所叢間有隱老丁  
明汲脫帽大笑眠其中客來烹魚侑以酒酒名  
琥珀照金籠節高不到四市路興酣時踏六鰲  
背寶林松栢近相摩端溪桃李遠相對秋冬之  
交菊花開菊花千葢人千載

東莞八景

和前人韻

市橋春漲

落天風雨走珠盤透入飛虹水潺漫市上吹簫  
驚商客湖中鼓棹困鼉龜危橋只因滑屐動况

值三春桃花湧景趣正從蒼烟尋懸泉高溜聊  
一弄

鳳臺秋霽

鸞鷲栖梧望古榕千金毛羽驚凡蛩洞庭聲雜  
龍門影鶉火西流曜靈空鳳之去今音幽寂鳳  
之來今舞紫碧臺上銜詔金鷄鳴萬里橫秋懸  
月色

黃嶺廉泉

峰勢如旗色帶碧况復中黃接地脉山泉冷冽



不可當招許與巢距盜跖問誰者濁誰者清此  
中廉泉值連城我寄冰心黃旗嶺雷响電激疑  
甲兵

寶山石甕

粵勝有一名猿峒峒險不如甕阻動此山艷富  
如金樞崇島巨鰲寒不凍石甕汲水吐溜怒未  
許谿訝評隆汚寶瘞山中靈我且磊落冲  
霄舉

彭洞水簾

昔人有彭此中立峯嶸嶽巖不可入一種飛瀑  
自天來漉漉泚泚非積粒形如門簾買無價爲  
誰卷舒此山掛洞府神君懷伊人碧玉空中珠  
不夜

靖康海市

渤海漭漭從天來烟霧茫渺爲誰開未知澄波  
卜聖世且隨蜃氣狎瑤臺島外洞壑樓千丈蘅  
臯不得神游行設有清風解朱塵依舊漁舟倚  
棹唱



海月風帆

巖名海月中央水伊人宛在琉璃地不數歸舟  
乘風來千里一日音信至有如寶筏渡浮蒲若  
同飛錫為先驅香雲花雨無止境一身貝葉浪  
五湖

覺華烟雨

覺華寺裡多琳宮談柄辯峰却不空若有若無  
有無內如水如月水月中猿去鶴來真恠特一  
身烟雨採來歷欲圖江山寄蒼茫鐘聲潮聲留

不得

東湖赴尹瀾柱吏部之招與陳元孝梁藥

亭凌天杓屈翁山林叔吾諸子同賦

湖上浮光好我為漱清泉况值此秋際樓曲雜  
鳴蟬速招木蘭棹來赴玳瑁筵湖主尹大夫轉  
鷁以相接八龍之駕何蜿蜒十千之酒如竹葉  
開樽已至北海朋當歌復載東山妾濟濟信為  
良宴會滿船新詩不勝獵元孝真逸民作賦不  
減士龍手藥亭名解元題詩直踞伯虎首翁山



舊騷人可續靈均後叔吾狂秀才嘗使杜康酒  
粵才挺出羅浮上又逢江左天杓子金釵十二  
與絲履人才文章號雙美湖上浮光好諸子沾  
沾喜我遊者頰矣此番尤徙靡主人引滿客盡  
醉樂府新聲角和徵勿使山靈水恠知我輩選  
幽勞筆紙

五言律詩

萊湖

久滯東官郡趕忙到萊湖危橋繞遠路低樹掩  
殘樓徑小輿容膝魚稀菜佐厨出門收晚興漪  
竹雜蒲蘆

其二

當此秋天盡寒風與我隨漁人收夜釣田客積  
新積山遠老松栢湖深肥蛤蜊更看萊竹好避  
俗恨來遲



琥珀坑郎事時有徵租之舉

薄宦風塵走特來  
珀水遊收成聽蟋蟀疾苦問  
童叟葉落千山響  
心閑百事柔幸完官稅早毋  
使司農憂

其二

喜有殘黎在欲行復躊躇  
客來因債迫官到爲  
糧逋滿路皆叢菊  
近鄉是鷓鴣宦囊清似水  
賒酒未曾沽

榕亭雜咏

莞署枕高崙結亭依古榕  
一蓬當瓦蓋兩板受  
藤封門納千家雪  
庭栽半畝松  
隣邊傍梵寺晨  
夕聽鳴鐘

其二

小亭何足咏偷坐半時閒  
花上黃鶯轉窓前  
白石頑鳳臺吹短笛  
旗嶺落輕鬟  
暫息榕陰下更  
聞流水潺

贈屈翁山山人

憐君不得意走陝復投燕  
南海一珠落黃河雙



鯉懸陸沉方朔米澤畔楚臣烟篋內詩千首囊  
中無剩錢

送季度遠世兄回毗陵

君行何太速再會尚幾年左右江邊棹西東嶺  
上眠游人看落日折柳寄長箋解纜將言別情  
深未忍前

麻涌二首

何地不饒水此涌與汝通舟隨鷗上下樓戴星  
西東海蛤纍纍白山栺樹樹紅我來探異勝冬

日照深澗

其二

作客過幾日聊看澗上蘼人聲通鳥語莞草雜  
番棧兩岸圍孤棹滄洲隱小池登臺瞻遠景有  
塔狀如獅

正月十六日盧述公廣文初度

鬚眉何戟戟一接有餘歡火樹燈如晝桃花味  
不酸春開鐵鎖禁月下赤瑛盤問所菁莪處新  
興與寶安



元宵與吳曰謙陳子薦蔡枚仲雋司觀燈  
正值元辰候又逢燈節期銀花開鐵鎖玉漏待  
黃鸝酒助詩人興月憑火樹移東城曲滿市勿  
問夜何其

協恭堂與尹伯興查懷孔福修齡三遊戎

小酌

喜得太平日天涯共劇談四郊萋秀艸一望渺  
青嵐愧我雲中鳥羨君指上鐔相逢何藉手斗  
酒與雙柑

宴盧升卿山樓兼賦贈

好友良非易茲樓集蕙蘭一山當面照萬木數  
聲寒登眺津頭市應酬柳外竿鬱金堂在望此  
日盍簪歡

以詩代書荅康晉公年兄

欲問丹霞渡惜無填鵲河客心隨絮柳鄉夢寄  
懸蘿地隔書如面情親石不磨君今讀禮畢早  
出共鳴珂

聞揚為谷年兄赴遂平之任賦寄



燕遊何日去分割天中圭激水汝淮雪呀山節  
度輦疎朋憑影雁薄宦倚殘黎豫粵雲邊路開  
書一半泥

七言律詩

富雲麓學士遠函過問賦謝

一別薊門有數年相思萬里未能前影隨鵙鵲  
銜清露夢入芙蓉揖島僊藜閣燃書劉子政掖  
庭賜錦李青蓮忽傳梅信雲間至瘴海生輝意  
獨牽

陳昌箕先輩携王望如陳澹庵二寅翁書  
至喜而有述

名熱詩壇四十春今雖白髮尚紅脣鷓鴣詞客



渴非病苜蓿先生清不貧望列石倉稱父執書  
來鳳驛結朋鄰粵閩咫尺煩相過豈獨江南有  
細蕁

陳伯球有臨高之行訪其弟次和氏便道  
入東莞賦此爲贈

有客起程自鹿沂門前柳色重依依且將弱絮  
牽行騎莫厭塵泥點客衣瓊島半程未問渡珊  
瑚一席爲開屏天涯骨肉情難盡海浪驚人勸  
早歸

贈初爾嘉進士

渥洼龍種羨騰飛王謝流風見紫薇銀管裁成  
太液曲錦袍奪作老萊衣花籠仙氣菊爭發草  
長神芝鶴亦肥願上一杯更勸駕黃封他日御  
筵歸

胡抑抑世兄來自淮陰賦贈

淮上笛聲入粵筵閩人爲報雁來箋行程多阻  
雲帆渡世講深交金石緣憶昔滌園稱傲吏伊  
今漱石訪靈仙君家自近鉢池處煉就丹砂結



大年

峇季鵬遠世兄時吾師在任縣因候問之  
甄山景勝近何如喜接來人讀素書湖上芙蓉  
頭竝蓋嶺南梅雪髮堪梳白眉兄弟君稱最絳  
帳師生我獨疎試看渚陽城角月遙思萬里欲  
飛車

元旦試筆

餘生又歷一年春夢入梅庄醒未真可是懸羊  
放雀景不殊索葦拆松塵酒呼萬壽庭燎旦節

值三元盤露新遙看飛鳧東北下海濱擬和讌  
宮臣

人日壽初珊洲工部

分陝芳徽啓後人才名早已動星辰香浮青鎖  
銅龍夜月滿丹庭繡鳳春持節桃花無漲水掛  
帆楓葉却思萼畫堂咲把萊衣舞聞道垂裳憶  
近臣

其二

鐵橋一望翠微間筆底烟雲四百山繞膝芝蘭



皆濟美摠衣玉筍各成班使星光燭司空座人  
日祥開太乙顏最喜燕臺會御李于今泰嶽得  
躋攀

和長公叔氏來韻

懸匏忽過五湖春每憶故園笑語新漳驛月騰  
天柱角粵山雲繞海幢濱翰來燕尾當寒暑製  
竝魚頭辨玉珉大阮竹林空一世扁舟載酒莫  
辭頻

早春送王敬之世丈還長山

二十六

東官草色欲芊芊公子鄉心日夜懸竹裏銀槽  
吏部酒江干繡被鄂君船雲飛長白知親舍花  
燄深紅惜別筵此去上卿應執政好攜彩筆入  
幽燕

早春坐雨

喜逢春色滿郊青正把椒觴倚曲櫺何意空濛  
飛障霧不堪散漫掩殘星梅花帶濕枝偏重黃  
鳥驚寒語暫停凍解早知和節至乾坤水上一

池萍附次兒懋焯和韻○南園楊柳色青青枝  
上鶯聲透碧櫺重霧忽來今日雨浮雲已



掩昨宵星焚香獨坐誰爲伴去鳥高飛竟不停  
日在天邊窺未出東風吹過小池萍

五言絕句

石龍舟次

朝辭白鶴觀暮入石龍津  
停棹問家信大半聞  
粵人

其二

勞勞逐利者鬧市石龍場  
獨我宦遊客滿船明月香

自咏

剗却龍江室特來鵬嶺鄉  
書生初薄宦細與家



人商

其二

十載北燕走一朝南粵遊  
奚山三十嶼大海泛孤舟

題遊春圖

遊春醉公子沿河採花藥  
鶯老桺熟時猶在青樓裏

七言絕句

鐵岡驛

磯頭風急水湯湯回首來程是鐵岡  
繫榜買魚賒酒去粵人又饋我桺榔

其二

珠江去驛有幾灘鷓影柁聲帶日殘  
夢到荔鄉渾未覺鷄鳴行李過東官

題畫

古渡悠悠風浪平花開兩岸帶鶯聲  
爲誰冒雪



此間過外愛美人月下橫

其二

馬蹋春泥趕渡橋  
橋危姑且呼魚橈  
水邊不數杏桃種  
偏映江樓恨小喬

對月

嫦娥初放兔猶狂  
照入曲房色似霜  
起傍珠簾玉鉤立  
斜看織女又梳粧

其二

偶步城西赴友招  
佳人疑在影中描  
填河烏鵲



